

1557
*Herculis
 Ferrariæ
 Ducis per
 Cymacii
 Episcopum
 cum Venetis
 efficiunt.*

culo ad opem sibi ferendam impelli posse arbitraretur, Cymacii Episcopum Venetias misit, qui, quo in discrimine Hercules versaretur, significaret: *In concordia Romæ inita præteritum, Hispanorum cupiditati, atque invidiæ obiectum fuisse; qui recentibus in Gallia successibus elati, veteris in illum effundendæ malignitatis ex oblata opportunitate causam peterent: eos propediem cum viginti peditum, duobus equitum millibus in suos fines impetum facturos: quocirca Reipublicæ, cujus se semper filium professus esset, opem, atque auxilium implorare: nihil sibi incommodi accidere posse, quin ex eo aliquid ad ipsam quoque manaret. Quos enim ab Hispanorum dominandi cupidine satis tutos esse, qui omnem fere Italiam perlustrarint, bellique facibus incenderint? Callide pacis legibus comprehensum iri Herculem noluisse, ut statim in ipsum arma inferrent; relictum, desertumque opprimerent. Quorum enim opem, quorum auxilia expectet? Gallorum ne, qui suis rebus veriti Italia decedere coguntur? an Pauli Pontificis Maximi, cujus auctoritate, ac jussu cum fœderatarum copiarum præfecturam suscepisset, ab eo modo desertus est? aliorum ne Italorum Principum, ex quibus Octavius Farnesius belli dux adversus ipsum a Philippo est declaratus? Cosmus novo Senarum beneficio obstrictus, magnam peditum, atque equitum manum in bellum confert? Unum sibi præsidium in Venetis ponere; Senatum orare, ut difficillimo, ac periculoso tempore illi præsto esse, opitulari, subsidiis juvare velit; vel eniti, ut turbo iste, qui suis ditionibus imminet, concordie aliqua ratione disjiciatur, ac propellatur.* Hæc Cymacii Episcopus. In eas enimvero curas, ac sollicitudines Herculem se demissurum, jam tum primum Veneti providerant, cum illum ad Gallorum partes accessisse cognoverant; cui quidem ut neutri se obstringeret, suasores semper extiterant. Ipse vero minime, ut solebat, communicatis consiliis, imperii proferendi spe captus, summum præfecturæ honorem sibi delatum avide susceperat. Ea vero utcumque Herculi accidissent, Hispanorum armis oppugnari moleste Patres ferebant. Verum ne profus de concordia desperarent, multa efficiebant: non alienus ab Italica pace Philippi animus; bella, quæ ab eo cum Henrico acerrime in Gallia gerebantur; Pauli Summi Pontificis